



السلام عليكم ورحمة الله، كيف حالكم يا
شباب عاملين إيه؟ الله يبارك فيكم يا رب
ويرضى عنكم منورين، كيف الحال؟ الله يبارك
فيكم يا رب ويرضى عنكم، عاملين إيه؟ ما
شاء الله اللهم بارك، صحتكم عاملة إيه؟ جزاكم
الله خيرًا، الله يحفظكم يا رب ويبارك فيكم،
جاهزين للايف؟ عايزكم تسمعوا الدرس
التاسع من الداء والدواء، اللي هيفوته الدرس
ده هيزعل قوي، الدرس ده خطير جدًا، واللي
مسمعش أي دروس يلحق يسمعها؛ عشان
هيبقى فيه إمتحان في نص الكتاب، إمتحان

بيني إن شاء الله كمان أسبوع كده هتلاقوا
إمتحان، فاللي هيلحق يلحق بقى عايزين نكمل
على خير وتأخذوا شهادات مستحقة لهذا
الكتاب العظيم، الداء والدواء يا رب يجمعنا
وابن القيم في الفردوس الأعلى اللهم آمين،
الواحد يعني بقى بيفكر في الجنة بشكل ثاني
يعني احنا دايمًا بنفكر في متع الجنة المعروفة
طبعًا؛ لكن اه الواحد بيتخيل كده يا رب يا رب
يرزق ابن القيم الفردوس الأعلى يا رب، إن
احنا دخلنا الجنة وقابلنا ابن القيم يعني دي
لوحدنا متعة، يعني لو الواحد في الدنيا كده
بذل مجهود كبير عشان بس يقابل ابن القيم كده
ويقعد معه، أكيد الموضوع يستحق يعني فما
بالكم بقاء الصحابة والأنبياء والرسل الكرام
وما بالكم بالنظر لوجه الله تعالى!

مجرد التفكير في المواعظ بس شوية ابن القيم
(رحمة الله عليه) أكيد ده لوحده شيء ممتع
التفكير فيه شيء ممتع، رحمة الله على ابن
القيم والعلماء الراشدين يا رب، طيب المهم
👉 النهاردة الفوزرة سهلة بقى: **من هي**
حفيدة هارون -عليه السلام- عشان
نبدأ؟ 🔍 هنتكلم عن إيه النهاردة؟ طبعًا عارفين
هنتكلم عن إيه، **صح** 🤝 **نور قالت أهي، مين**
تاني؟ لا الإجابة ليست السيدة مريم للأسف
السيدة مريم مش حفيدة هارون (عليه السلام)
هي قريبة ليه بس مش حفيدة ليه، **صح** 🤝
سارة قالتها صح 🤝 **وسهام ويارا برافو**
عليكم شاطرين 🤝 ، مين اللي حفيدة هارون
-عليه السلام-؟ 🤝 السيدة صفية بنت حيي

بن أخطب -رضي الله عنها وأرضاها- أمنا، أم المؤمنين لأن السيدة صفية فعلاً من نسل هارون فعلاً، تنسب إلى هارون جدها هارون فعلاً يعني من أجدادها يعني هارون -عليه السلام- بالفعل، صح هنتكلم عن السيدة صفية -رضي الله عنها وأرضاها- يلا بقى إعملوا شير ومنشن بقى كتير عشان نبداً إتفقنا، النهاردة هيبقى لقائنا جميل كده حضرتم لقاء أم سلمة؟ إيه رأيكم نكمل في الموضوع ده شوية كده؟ زوجات النبي -عليه الصلاة والسلام-، الموضوع ده مفيد جداً وشيق فيه فوايد خطيرة الصراحة طيب يلا شير شير كله يعمل شير

هنبتي دلوقتي حالاً اللايف منشن منشن منشن للعالم كله عشان هنبداً حالاً جاهزين؟ يلا بينا،

الحمد لله وأشهد أن لا إله إلا الله وحده لا شريك له وأشهد أن محمداً عبده ورسوله - صلى الله عليه وسلم- أما بعد؛ أهلاً ومرحباً بكم في لقاء جديد ولايف جديد من لايفات يوم الإثنين

احنا كنا بدأنا في لقاءتنا دية إن احنا نتكلم عن موضوع مهم، كان نفسي أتكلم عليه من زمان وبقالي زمن كده الواحد عنده النية بس إيه بيقول يا رب إديني الوقت وهو الكلام عن خير النساء هم زوجات النبي -عليه الصلاة والسلام-، موضوع شيق موضوع له فوايد جديدة هنتكلم على زوجات النبي -عليه الصلاة والسلام- فبيكون فيه جزء كبير جداً من الموضوع جوة بيت النبي ﷺ بنتعلم آداب، بنتعلم سنن، بنتعلم أخلاق، بنتعلم كيف تكون

المرأة زوجة، كيف يكون الزوج، إزاي كانوا بيتعاملوا مع النبي -عليه الصلاة والسلام-، إزاي كان بيتعامل معاهم، الحقيقة الموضوع ده يعني غير، بيبقى ليه مذاق خاص غير كلام على مثلاً قصص الصحابة أو قصص الأنبياء أو أي نوع من القصص لأن ده متعلق بحاجة مش بتكرر، وبيوت النبي -عليه الصلاة والسلام- والحاجات الخاصة اللي كانت بتحصل، فبتطلعوا بفوايد مش هتلاقيها فحثة تانية لما بنتكلم عن زوجات النبي -عليه الصلاة والسلام-، فاللي عايز أقوله إن احنا نحاول النهاردة ناخذ قصة جديدة من القصص الجميلة ديت وسمينا الدرس "حفيدة هارون" حفيدة هارون -عليه السلام- يعني للتشويق كده عشان أشوف أنتم هتلقوها لوحدهم ولا لا،

ولا شك إن حفيدة هارون هي صفية -رضي الله عنها وأرضاها-، صفية بنت حيي بن أخطب، حيي بن أخطب معلوم كان رأس اليهود وزعيم اليهود زعيم بني النضير، بس هو الفكرة إن صفية -رضي الله عنها وأرضاها- النسب بتاعها بيمتد لغاية سيدنا هارون، يعني هي صفية بنت حيي بن أخطب بن شعبة بن ثعلبة بن عبيد بن كعب ويفضل النسب كده مستمر إلى هارون بن عمران أخو موسى -عليه السلام-، فهي فعلاً حفيدة مباشرة أو ممكن نسميها بنت هارون عادي يعني أحياناً ممكن تتسمى بنت هارون ممكن تتسمى حفيدة هارون، والنبي -عليه الصلاة والسلام- سماها قال لها "أنتِ ابنة نبي" كما سمعت في القصة فيصح إن احنا نسمي صفية -رضي الله

عنها- ابنة هارون، ممكن نسميها حفيدة هارون، المهم أن لها شرف لا شك يعني احنا بنقول إن أنا دايماً اللي هو مؤمن يبقى جده نبي ده بيبقى من الأشراف يعني احنا بنقول اللي نسبه يمتد إلى النبي -عليه الصلاة والسلام- يعد من الأشراف، فلا شك إن أي أحد مؤمن في أجداده النبي لا شك أنه يعد من الأشراف، فصفية -رضي الله عنها- شريفة حفيدة شريف ومن كهارون -عليه وعلى نبينا الصلاة والسلام-، فالمهم دي المعلومة الأولى اللي احنا النهاردة بنطلع بها نحاول إن احنا نجمع معلومات عن السيدة صفية -رضي الله عنها وأرضاها- واتولدت امتى؟ فين؟ ماتت امتى؟ ازاي؟ قصتها إيه؟ اتجوزت النبي -عليه الصلاة والسلام- امتى؟ ازاي؟ خرينا نجمع

معلومات عشان للأسف الموضوع ده يمكن
مبقاش فيه حد بيتكلم فيه كتير لدرجة إن أنا
أعتقد إن احنا دلوقتي ما بينا ناس بنات للأسف
وشباب ميعرفوش كتير عن زوجة من
زوجات النبي -عليه الصلاة والسلام- في
الوقت اللي احنا حافظين فيه أخبار فنانيين
وممثلين ولا عبين وعارفين قصص أصحابنا
كل واحدة عاملة إيه وكل واحد بيعمل إيه،
يعني عارفين كل حاجة، إزاي معندكش
فضول إنك تعرف أخبار صفية ابنة حيي بن
أخطب؟ رضي الله عن صفية وصلى الله وسلم
على نبينا محمد، يعني خيلنا النهاردة نستمتع
ناخد معلومات كده، ونسجل معلومات ونحاول
نحفظ النهاردة سيرة أم المؤمنين صفية، وأنا
هساعدكم أوي إن احنا ناخدها واحدة واحدة

طيب، خلاص احنا اتفقنا إنها صفية بنت مين؟
بنت زعيم اليهود وده وطبعًا حيي بن أخطب
زي ما هنشوف قُتل بعد غزوة الأحزاب،
ومات طبعًا يهودي يعني هو كان زعيم بني
النضير وهنشوف دلوقتي تفاصيل موضوع
اليهود دوت، لكن عمومًا صفية بيتمد نسبها
حيي بن أخطب بن شعبة بن ثعلبة بن عبيد
ونفضل كده السند أو أسماء أجدادها لغاية
متلاقي مرة واحدة هارون بن عمران، فهي
حفيدة هارون -عليه وعلى نبينا الصلاة
والسلام-، اتولدت امتى؟ صفية -رضي الله
عنها وأرضاها- أحيانًا برضه من الحاجات
اللي دايمًا احنا بنتخيلها إن زوجات النبي -
عليه الصلاة والسلام- دول ستات كبار أو
يعني على إعتبار إن هو كان أغلب زيجاته

كانت على كبر -عليه الصلاة والسلام؛ لكن المفاجأة إن أنتم هتعرفوها إن السيدة صفية اتولدت سنة 9 قبل الهجرة، مش قبل البعثة يعني هي أصلاً اتولدت بعد البعثة، بعد بعثة النبي -عليه الصلاة والسلام- بتلت أربع سنين، يعني النبي -عليه الصلاة والسلام- لما كان عنده مثلاً 43 أو 44 سنة كانت هي لسنة بتولد في المدينة، يعني هو لسه قبل الهجرة أصلاً كانت السيدة صفية لسنة هتولد في المدينة، فلما هاجر النبي -عليه الصلاة والسلام- كانت السيدة صفية عندها 9 سنين، والنبي -عليه الصلاة والسلام- تزوجها سنة 7 من الهجرة بعد فتح خيبر، تزوجها متى؟ سنة سبعة من الهجرة يعني بعد فتح خيبر يعني كان عندها كم سنة؟ يعني كان عندها أقل من

17 سنة، ما بين 16 و17، طبعًا دي بالنسب لكم إيه ده بجد؟ أنا كل واحدة تقول أنا متخيلاها مثلاً عندها ثلاثين أربعين سنة مثلاً، لا ده هي إتجوزت النبي -عليه الصلاة والسلام- وهي صغيرة، بل النبي -عليه الصلاة والسلام- مات وهي تقريبًا عندها 20 سنة يعني تخيلوا بقى، وعاشت بعد النبي -عليه الصلاة والسلام- مدة كبيرة عاشت بعد موت النبي -عليه الصلاة والسلام- أربعين سنة كمان عاشت بعد موت النبي -عليه الصلاة والسلام- كم سنة؟ أربعين سنة يعني ماتت عندها حوالي ستين سنة، ماتت سنة كام بقى؟ ماتت سنة 50 هجرية احنا، بناخد معلومات كده معلومات وبنتعلم عن السيدة صفية إحفظوا بقى معايا عشان نمشي واحدة

واحدة، طيب أمها تدعى بَرَّة بنت سموأل،
خلاص دي معلومة كده جانبية مش هتفيدنا
أوي في القصة، طيب تعالوا ناخذ واحدة
واحدة صافية بنت حيي بن أخطب وطبعًا
توقعوا زعيم اليهود حيي بن أخطب زعيم بني
النضير، طيب واحدة واحدة يعني إيه بني
النضير؟ عشان برضو أنا بحس إن أنا للأسف
دلوقتي بكلم جيل الأساسيات مش موجودة،
يعني أنا بتكلم ممكن كلمة بني النضير دي في
ناس مش فهمها يعني، طيب نقول واحدة
واحدة اليهود يا جماعة لما برضو أديكم
معلومة هتفيدنا في حاجة جاية دلوقتي، اليهود
حصلت لهم هجرة أنتم عارفين اليهود كانوا
أصلًا عايشين عند بيت المقدس، كانوا بيعيشوا
في الشام وحوالين الشام على إعتبار إن ده

مكان أنبيائهم، طيب بعد كده حصل لهم ملحمة
يعني حصل لهم إن هم تسلط عليهم الرومان
بعد زمان عيسى -عليه السلام- يعني بعد رفع
عيسى -عليه السلام- تقريبا سنة 70 ميلاديا أو
حاجة كدة، تسلط عليهم الرومان وساموهم
سوء العذاب وطردهم من بيت المقدس، طيب
لما اليهود إقتربوا من بيت المقدس تفتكروا
راحوا فين؟ مفكروش يرجعوا تاني بيت
المقدس، ليه؟ لأن عندهم في كتبهم بالك بقى
عندهم في كتبهم إن نبي آخر الزمان مش
هيبعث عند بيت المقدس ولن يبعث في الشام؛
وإنما بعثته في بلدة وسط الجبال فيها نخل
كثير، وده اللي عارف قصة سلمان الفارسي
لما كان سلمان أصلاً مجوسي بيعبد النار وبعد
كده تنصر، وبعد كده إنتقل إلى الشام في قصة

طويلة يعني، وتعرف على القساوسة وبدأ
يقرب من القساوسة، ويحاول إن هو يعرف
الدين الحق، المهم قصة طويلة وفي الآخر كان
ينتقل من قسيس لقسيس من راهب لراهب
لغاية آخر واحد وصل له قاله أنا معرفش حد
على دين المسيح الحق خلاص، ومش عارف
أقولك روح لمين، هو كان بيشرط على أي
قسيس يقعد معاه يقوله متودنيش إلا عند واحد
تعرف إن هو على دين المسيح الحق، أنا مش
عايز تحريف فكان واحد يوديه لواحد، لدرجة
إن هو كان الحقيقة يطلع من الشام يروح
العراق ويطلع من العراق يروح الشام، وكده
لغاية ما آخر واحد خالص قال له بص أنا
معرفش حد خلاص على دين المسيح الحق،
ولكن أظلك زمان نبي لكن أظلك ايه؟ يعني

الزمن دة زمن نبي آخر الزمان ده زمن نبي
آخر الزمان حلو الكلام، فقال له حلو قال له
طب هو فين؟ قال له أنا ما أعرفش فين
بالظبط بالظبط فين بس هو مبعوث في بلدة
يعني كُتَبنا بتقول إن هو مبعوث في بلدة بين
حارّتين، الحارّة يا جماعة معناها الجبل الكبير
اللي حجارته سوداء كلمة حَرّة؛ يعني جبل
عشان اللي بيسمع الحديث مبيفهموش الحارة
؛هي جبل ضخّم تبقى حجارته سوداء، فيقول
له مبعوث في بلدة بين حارّتين يعني بين
جبلين كبيرين حجارتهم سوداء وفيها نخل
كثير فالقصة إن المهم سلمان -سبحان الله-
حصل ظروف كده وفيه قطاع طريق ضربوه
وسرقوه وكتفوه وباعوه، فعلى نصيبه إشتراه
يهود، فلما اليهود إشتروه راحوا به

المدينة، فلما راح المدينة لقي مرة واحدة نفسه في مكان بين الجبال، جبال سودة ومليان ايه؟ نخل كثير فعرف إن هو ده المكان اللي هيرسل أو اللي هينتقل فيه النبي -عليه الصلاة والسلام- ففضل قاعد في المدينة وهو مش عارف إمتى النبي هيجي معرفش ايه اللي هيحصل لغاية ما فعلاً هاجر النبي عليه الصلاة والسلام للمدينة، وراح سلمان وإتعرف عليه وبدأت قصة سلمان، اللي عايز أقوله ليه بقى أنا بقول الحثة دي عشان عايز أوصلك للمعلومة معلومة إن اليهود لما الرومان طردوهم من بيت المقدس للمرة الثانية؛ لإن هما كانوا حصلهم مرتين طرد، مرة على يد "نبوخذ نصر الكلداني" ودي كانت قبل الميلاد أصلاً ميلاد عيسى، ومرة ثانية كانت بعد رفع

عيسى -عليه السلام- وطردهم الرومان لكن
المرّة الأولى لما إتطردو من بيت المقدس
قبل ميلاد المسيح، رجعوا تاني لبيت المقدس،
عشان عارفين إن لسه في نبي تاني، تمام لكن
المرّة الثانية لما طردهم الرومان بعد رفع
المسيح -عليه السلام- ما رجعوش بيت المقدس
طب ليه ما رجعوش بيت المقدس، عشان
عارفين إن نبي آخر الزمان مش في بيت
المقدس، وإنما سيبعث في بلدة بين حارتين
اللي هو جبال سوداء كبيرة وفيها نخل، فعلى
طول هم عارفين الخريطة فغلب على ظنهم إن
المكان ده هو المدينة عشان كده اليهود في
نقلتهم الثانية كلهم اتحركوا ناحية إيه؟ المدينة،
فمنهم اللي سكن في المدينة ومنهم اللي سكن
في خير، خير جنب المدينة كده كده؛ لكن

خير عشان فيها ثمار وفيها زرع وكده،
فاليهود طبعًا عشان الموضوع المادي ده
بيهمهم أوي، فقال لك إحنا ايه؟ هنقعد شوية
في خير وشوية في المدينة، فهاجر اليهود
وعاشوا فعلاً من زمان طويل من قبل بعثة
النبي -عليه الصلاة والسلام- بزمن عاشوا في
الأماكن دي في المدينة وفي خير، وبدأوا
يعيشوا وسط العرب ويتعلموا لغة العرب،
وإختلطوا بهم لدرجة إن هم حتى بدأوا يتسموا
بأسماء العرب، عشان كده ما تستغربش إن
تلاقي يهودي وفي المدينة واسمه زي أسماء
العرب عادي، وفي خير واسمه زي أسماء
الايه؟ أسماء العرب، فهم خلاص هم إختلطوا
بالعرب لدرجة إنهم بيتكلموا عربي وبيسموا
أسماء عربية عادي جدًا وبيسموا بناتهم أسماء

عربي، وخلاص والدنيا كلها بقوا عادي جدًا
وسط العرب؛ لكن لسة لهم أماكن لوحديهم
،يعني حتى بيعيشوا في أحياء لوحديهم، ما
زالوا يهود بيعيشوا في أحياء لوحديهم طبعًا
شايقين نفسهم أحسن من العرب؛ لأن دول أهل
كتاب ومعانا كتاب ويعتبروا دول إيه؟ دول
اللي هم المتدينين يعني بالنسبة للعرب يعني؛
لأن العرب عباد أوثان فدول على الأقل دول
منسوبين للكتاب، فبيعثروا نفسهم أشرف من
العرب؛ لكن هم كده كده مستنيين فيه نبي في
آخر الزمان هيبعث هنا مستنيينه أول ما يجي
هنملك العرب، ونملك العالم زي ما كُتبتنا
بتقول، بس هم ما خدوش بالهم إن كُتبهم بتقول
إن فعلاً النبي آخر الزمان ده هيملك وهيحكم
وهيبقى له سلطان، بس المعلومة اللي ما

كانتش عندهم إن النبي دا أصلًا من العرب
مش من بني إسرائيل، تمام لأن هما توقعوا إن
يكون من بني إسرائيل لأن كل الأنبياء من بني
إسرائيل، يعني كل الأنبياء السابقين من بعد
إسحاق -عليه السلام- ويعقوب كانوا من بني
إسرائيل فايه الجديد؟

فأكيد هيبقى من بني إسرائيل؛ لكن الصدمة
إن النبي مكانش من بني إسرائيل وطلع من
العرب

﴿ فَلَمَّا جَاءَهُمْ مَا عَرَفُوا كَفَرُوا بِهِ فَلَعْنَةُ اللَّهِ
عَلَى الْكَافِرِينَ ﴾ [البقرة: ٨٩]

فاللي عايز أقوله إن اليهود لما إنتقلوا بقى،
اليهود طبعًا هم نفسهم عائلات، فلما راحوا
المدينة إتقسموا (بقى في حاجة اسمها بنو

قينقاع، وفي ناس اسمهم بنو النضير، وفي
ناس اسمهم بنو قريظة) **ايه دول؟**

﴿عبارة عن ثلاث ايه؟ ثلاث طوائف من
اليهود، كل طائفة مع نفسها وعائشة يعني ليهم
نظامهم؟ وهم مش بيختلطوا ببعض، كل واحد
واخذ حي لوحده على أطراف المدينة،
وعايشين كده، اه بيخالطوا العرب بيخالطوا
بعض، بس أنت في حالك وأنا في حالي

﴿بنو قينقاع لهم نظام وبنو النضير لهم نظام
وبنو قريظة لهم نظام ثاني وكل واحد له حياته
الخاصة تمام.

﴿تَحْسَبُهُمْ جَمِيعًا وَقُلُوبُهُمْ شَتَّى﴾ [الحشر:

[١٤

وفي ناس في خير ملهمش دعوة بالدنيا

دي خالص طيب صفية بقى كانت بنت مين؟
بنت حيي ابن أخطب

■ من بقى حيي ابن أخطب؟ حيي ابن أخطب
زعيم بني النضير

ده نمرة واحد في بني النضير، وده هيدينا
ملاح دلوقتي، فده بيخلينا نفهم دلوقتي كذا
حاجة. ليه صفية (رضي الله عنها وأرضاها)
كانت امرأة شريفة؟

امرأة شريفة لأن هي تعتبر بنت زعيم يا
جماعة، يعني تعتبر بنت زعيم بني النضير
بغض النظر عن حيي ابن أخطب وقبح
سريره، لكن ما زالت هي ابنة زعيم. تمام؟

← دا نمرة واحد.

← نمرة لثنين ده بيفهمك ليه صفية كانت جميلة؟

صفية بنت حيي كانت رائعة الجمال يا جماعة، كانت مبهرة في الجمال، توقعوا يعني زعيم اليهود هيتزوج من؟

أكيد سيتزوج امرأة جميلة، وأكيد ابنته ستكون لها من الرعاية والعناية الأمر العظيم.

← فكانت صفية رائعة في الجمال، بنت حيي ابن أخطب تخيل واحدة بنت زعيم لا شك إن الناس دول نسلهم مختلف يعني تمامًا.

← وتخیلوا بقى تربية كانت عاملة إزاي يعني رُقِّي صفية (رضي الله عنها

وأرضاهما)تربية في بيت زعيم مهما كان أكيد
التربية عالية أكيد المستوى في الكلام وفي
الرقى وفي التعامل مختلف تمامًا وهنشوف
رُقِي صفية (رضي الله عنها) في تعاملاتها
جميلة جدًا، راقية جدًا ، شريفة وذات حسب
ونسب شريف طبعًا أقصد هارون عليه السلام
، فأنت بتتكلم في مستوى، لأ مستوى فعلاً
صفية مستوى، تمام .

← مستوى في النسب ، مستوى إجتماعي،
مستوى أخلاقي، مستوى سلوكي، مستوى
فكري، كل حاجة عايز توصفها جميلة توصف
بها صفية (رضي الله عنها وأرضاها)

حتى زي ما هنشوف كان زوجات النبي (عليه
الصلاة والسلام) بيغيروا منها جدًا، خاصة
عائشة إن هي طبعًا منافسة قوية وإن كانت

يعني عائشة طبعًا هي هي نمرة واحد مفيش كلام.

🌀 لأن عائشة جميلة بردو جميلة جدًا، بنت أبو بكر شريفة وحسبية ونسبية وكل حاجة عايز تقولها في السيدة عائشة قولها، مين اللي كان بينافس عائشة مثلاً قبل صفية؟ زينب

🌀 زينب كانت تنافس عائشة لأن زينب هاشمية بنت عمّة النبي (عليه الصلاة والسلام)، زينب كانت جميلة،

جاءت صفية بقى معادلة ثانية، صفية باهرة الجمال (رضي الله عنها وأرضاها) شريفة، ابنة نبي، ابنة زعيم، فجاءت صفية بدأت إيه؟ بدأ يحصل غيرة جماعية من زوجات النبي (عليه الصلاة والسلام) وده شيء يعني معفو

عنه وده جبلة في النساء مش هنتكلم في الحنة
دي كتير لا يعيبهن ذلك لكن هنشوف مواقف
ظريفة أوي حصلت بسبب الموضوع دا
وإزاي هنشوف النبي (عليه الصلاة والسلام)
إزاي كان بيدافع عن صفية (رضي الله عنها
وأرضاهما) من إنصافه وعدله (عليه الصلاة
والسلام)

**خلاص إحنا كده بنبتدي نتصور إحنا بنتكلم
عن مين؟**

**أنا عايزكم الأول أحطك على التراك يعني
أنت بتتكلم عن مين؟**

**بتتكلم عن صفية، يعني حاجة زي ما بيقول
كده فخمة، حاجة فخمة، تمام.**

طبيب صافية بقى (رضي الله عنها) دي

طبعًا إنتم بتتكلموا في واحدة بنت الزعيم
وبالتالي زي ما بنقول كده بالبلدي واخدة الدلع
كله، واخدة إيه؟ واخدة الدلع كله من أبوها تمام،
أبوها كان بيحبها جدًا جدًا، حيي ابن
أخطب.

وكان ليها عم اسمه أبو ياسر، كان عمها
اسمه إيه؟

اسمه أبو ياسر، عشان كده قلتكم هم كانوا
بيتسموا بأسماء العرب عادي ما تستغربوش
يعني، عمها كان بيحبها جدًا بردو. عمها كان
أيه؟ كان بيحبها جدًا جدًا

هي السيدة صافية بتقول كدا، كان أبي حيي
وعمي أبو ياسر كانا لا يعدلان بأحد من

أبنائهما ،يعني لا عمي ولا أبويا يحبوا حد في الدنيا زيي، وكان إذا دخلا في البيت يعني كانوا يسيبوا اللي في أيديهم يقعدوا يتكلموا معايا ويهزروا معايا ويضحكوا معايا ويكلموني ونقعد بقى إيه؟ ونقعد مع بعض ما يشبعوش مني ولا بشبع منهم، يحبوني جدًا جدًا ودي كانت إيه؟

دي كانت النقطة اللي عملت موقف كده مع السيدة صفية مش قادرة تنساه أبدًا ما نسيتهوش أبدًا، وده كان أحد أسباب إسلام صفية .

🌀 بتقول صفية (رضي الله عنها وأرضاها) إن مرة بقى من المرات العادي أبويا داخل وعمي داخل فبتقول مرة كده أتأخروا على غير العادة، طبعًا هي مش فاهمة هي كانت في الوقت ده عندها مثلاً تسع، عشر سنين، كان

النبي (عليه الصلاة والسلام) هاجر للمدينة،
هي طبعًا الفترة المكية ملهأش قصة هي
بالنسبة لنا طفلة تقريبًا في الفترة المكية، بدأت
صورة السيدة صفية تظهر في بداية الهجرة.

﴿ فلما النبي (عليه الصلاة والسلام) هاجر
إلى المدينة ونزل في قباء.﴾

﴿ أول ما نزل نزل فين؟ في قباء كما هو
معلوم.﴾

﴿ مين اللي على طول راح له؟ اللي على
طول راح له حيي بن أخطب وأبو ياسر.﴾

﴿ خد بالك في حيي ابن أخطب مش زعيم
بس ، لا زعيم وعالم ، عالم من علماء اليهود
،حبر من أحبار اليهود، وفهمان كويس جدًا
وحافظ الكتاب بتاعهم. حتى قيل والله تعالى

أعلم، أنه أصلاً كان يحب صفية؛ لأنه وجد في كتبهم أنها تشبه إحدى زوجات نبي آخر الزمان، وجد في كتبهم أن وصفها كوصف إحدى زوجات نبي آخر الزمان، فكان يرجو إن هي فعلاً تكون زوجة نبي آخر الزمان، لذلك كان بيعتني بها جداً بيهتم بها جداً، فهمنا، سبحان الله هو فعلاً حصل اللي هو عارفه يعني.

فالمهم يعني لما نزل النبي (عليه الصلاة والسلام) في قباء راح له حيي بن أخطب وراح له أبو ياسر اللي هو عم صفية وراح شافه، شافه بعينه بقى، أبو ياسر معندوش علم زي حيي، حيي هو اللي جامد وأبو ياسر تابع فراح وراح وكلم قيل إن هو كلم النبي (عليه الصلاة والسلام)، سألته أنت مين، فبين أبوك

قال له أبويا مات طب مين كفلك؟ جدي
كفاني الأول وبعد كده عمي كفاني وبعد كده
طب أنت اشتغلت في إيه؟ اشتغلت في رعي
الأغنام وبعد كده اشتغلت في التجارة، طب إيه
اللي حصل؟

قعد يسأله شوية أسئلة، وبعد كده شاف في
ظهره خاتم النبوة، خاتم النبوة هي علامة بين
كتفي النبي (عليه الصلاة والسلام)، لها إشارة
كده أو حاجة عارفها اليهود إن دي موجودة
في نبي آخر الزمان، ورجع حيي طبعًا طول
ورجع متأخر ورجع معه أبو ياسر.

صافية بقى بتقول دخلوا علي ولا كأنهم
يعرفوني، ولا كأنهم إيه؟ يعرفوني، دخلوا عليّ
ولا كأنني موجودة، لأول مرة في حياتي
أشوفهم كده، قالت جاء فاترين كسلانين

ساقطين تمام؟ فهششت إليهما -رايحة بقى
حبيبي بابا، عمو عامل إيه؟- بتقول ولا كاني
موجودة ولا عبروني ولا كلموني ولا حتى
شافوني ده مش حاسين بحاجة، مش حاسين بيا
ولا كاني موجودة، فطبعًا ده بالنسبة لها
إيه، إزاي؟

طبعًا ده مثلاً تسع، عشر سنين فالموضوع
حاسس في نفسها أوي ويعني ليه بتعملوا
كده؟ بتقول فرميت ودنى بقى، أشوف إيه
الموضوع أنا لازم أفهم، فقالت: لو فألقيت
سمعي قعدت أسمع هما بيقولوا إيه أنا قولت
في مصيبة، قالت فسمعت عمي أبا ياسر يقول
لأبي حيي بن أخطب: يا حيي، يا حيي أهو هو
الذي نجده في كُتبنا، أهو هو الذي نجده في
كُتبنا.

﴿فقال: أبي نعم والله هو هو .فقال: يا حيي
تعرفه بنعته وصفته بالظبط؟ قال: نعم هو هو
(يعني هو بالظبط)

﴿فقال: فما في نفسك منه، فما تقول فيه،
هنعمل إيه؟

﴿قال: عداوته والله ما حييت، عداوته والله
ما حييت . عجيب والله سبحان الله!

والعجيب إن أبو ياسر طبعًا،الموقف دا أثر في
صفية جدًا ،خد بالك ده ما بيتنساش، بس ده
هيكون من أسباب إسلامها بعد كده إنها تسلم
بسرعة جدًا،تسلم بين يدي النبي (عليه الصلاة
والسلام). والعجيب إن أبو ياسر نفسه كان بعد
كده بينصح حيي" يقول له طب ما تؤمن به
وخلص".

وكان يقول "يا ابن أُمي أطعني، أطعني في هذا الأمر، وأعصني فيما شئت بعد ذلك"

يعني أبوس إيدك، أبوس إيدك نؤمن به، نؤمن به واللي أنت عايزه بعد كده أعمله، أعمل اللي أنت عايزه بس نؤمن به إحنا ليه معاندين؟ ليه؟ طب ما أنت اللي قايل له بلسانك : هو .

طب ليه بتعمل، ليه نعديه؟ طب ما نؤمن به قال له: والله أبدًا أبدًا. بص الغل

﴿وَدَّ كَثِيرٌ مِّنْ أَهْلِ الْكِتَابِ لَوْ يَرُدُّونَكُم مِّنْ بَعْدِ إِيمَانِكُمْ كُفَّارًا حَسَدًا مِّنْ عِندِ أَنْفُسِهِمْ مِّنْ بَعْدِ مَا تَبَيَّنَ لَهُمُ الْحَقُّ فَاعْفُوا وَاصْفَحُوا حَتَّى يَأْتِيَ اللَّهُ بِأَمْرِهِ إِنَّ اللَّهَ عَلَى كُلِّ شَيْءٍ قَدِيرٌ﴾ [البقرة: ١٠٩].

من بعد إيه ؟ { مِّنْ بَعْدِ مَا تَبَيَّنَ لَهُمُ
الْحَقُّ }

قال والله لا أطيعك أبدًا، لا أطيعك في هذا
أبدًا، واستحوذ عليه الشيطان.

وقومه عرفوا رأييه لكن اتبعوه على رأييه؛
لأنه زعيم اليهود، سبحان الله !

﴿يعني { إِنَّكَ لَا تَهْدِي } إيه؟

{ مَّنْ أَحْبَبْتَ وَلَكِنَّ اللَّهَ يَهْدِي مَن يَشَاءُ }]

سورة القصص : 56]

بنو النضير بعد كده حصل إيه، قصة، إيه هي
القصة بقي؟ إن طبعًا إحنا عارفين إن اليهود
كل فئة من اليهود حصل لها موقف، بسببها
النبي (عليه الصلاة والسلام) طردهم أو
قتلهم.

■ بنو قينقاع أول حاجة دول اللي عملوا إيه؟

في امرأة مسلمة دخلت عندهم في الحي
بتاعهم تشتري ذهب ، أو تشتري حاجة يعني
فجه واحد يهودي ربط هدومها كده إيه الجزء
اللي تحت في الجزء اللي فوق فالهم بطريفة
معينة فلما قامت انكشفت عورتها، شوف اليهود
عايزين إيه يا بنات؟ اليهود عايزينكم تكشفوا
العورات، اليهود عايزينكم تكشفوا العورات

{ وَاللَّهُ يُرِيدُ أَنْ يَتُوبَ عَلَيْكُمْ } [سورة النساء

[27 :

و اليهود تبع الشيطان { يَبْتَئِيْ عَادَمَ لَا يَفْتَنَنَّكُمْ
الشَّيْطَانُ كَمَا أَخْرَجَ أَبَوَيْكُمْ مِنَ الْجَنَّةِ يَنْزِعُ
عَنْهُمَا لِبَاسَهُمَا لِيُرِيَهُمَا سَوْءَاتِهِمَا } [سورة

[الأعراف : 27]

البنـت الـلي بتـبين نص دراعها ، البنـت الـلي
بتـبين نص شعرها ، البنـت الـلي بتـبين حتـة من
صدرها وبـبيان كـده الحـجاب كـده قافـش هنا
وصدرها باين من هنا وبعد كـده حـجاب عادي،
ولا حول ولا قـوة إلا بالله فالـمهم الـيهود قالـك
إيه حبوا و إلى الآن مخططات الـيهود كلـها في
كشـف عـورات المسـلمات، لكن للأسف دلوقتـي
مش بيكشفوها كـده زي ما عمل بنو قينـقاع
بيكشفوها بمزاجك بمزاجك؛ إنك أنت بيـقنعوك
إن هو ده اللبس هو ده الحـرية الضيق ده
الموضـة ، والحـجاب ده خنقه وووو لغاية ما
أنتِ تكشفي العورة بنفسك في حرب قامت
عشان عورة مسـلـمة يا الـلي بتكشفي عورتك
دلوقتـي في يوم من الأيام في حرب قامت
عشان في يهود اـتـطردوا علشانك اـتـكشفت

عورة مسلمة، وبعد كده في مسلم بقى غار فقام
فقتل اليهودي اللي عمل كده، فقام اليهود فقتلوا
المسلم فقام النبي عليه الصلاة والسلام حاصر
بنو قينقاع وطردهم طردهم وأجلاهم عن
المدينة طردهم وأجلاهم عن المدينة طردهم
وأجلاهم إيه؟ عن المدينة سبحانه الله، فكده
بنو قينقاع خرجوا كده إيه؟ خرجوا تمام؟

بنو النضير بقى ليهم موقف.. بنو النضير
مرة النبي عليه الصلاة والسلام راح لهم في
موقف ما يعني قصة في موضوع معين
وجلس النبي عليه الصلاة والسلام تحت جدار
ف بنو النضير قررروا إن هما يقتلوا النبي
عليه الصلاة والسلام، فجابوا راجل قالوا له
تجيب حجر كبير وترميه، فالله سبحانه تعالى
أرسل جبريل عليه السلام و أوحى للنبي عليه

الصلاة والسلام إن اليهود دبروا لقتلك فالنبي عليه الصلاة والسلام طلع من عند بني النضير، وراح جمع الصحابة وحاصروا بني النضير والمهم القصة خلاصة يعني إن هو في الآخر أجلاهم برضوا عن المدينة وطردهم طردهم من المدينة تماماً زي بنو قينقاع لما اتطردوا من المدينة لما اتطردوا من المدينة حصل إيه؟ حصل التالي

منهم اللي راح الشام، ومنهم اللي راح خيبر..

فلما اتطرد بنوا من النضير المدينة منهم اللي راح لناحية الشام والأغنياء فيهم راحوا خيبر علشان خيبر دي بتاعة اللي الأغنياء، دي الساحل الشمالي بتاع اليهود، راحوا خيبر فمنهم كان حيي ابن أخطب حيي ابن أخطب راح الإيه؟ راح خيبر وقعد فيها وبدأ حيي بن

أخطب يدبر المكائد للنبي عليه الصلاة
والسلام من خير بدأ يدبر المكائد للنبي عليه
الصلاة والسلام من خير

حيي بن اخطب هو سبب غزوة الأحزاب لإن
حيي بن أخطب بدأ بعد كده تمرکز في خير
وبدأ يدبر الحرب على النبي عليه الصلاة
والسلام من خير، فراح للعرب راح
لقريش وراح لغطفان واقنعهم إن هما يهجموا
على المدينة وكان هو السبب في غزوة
الأحزاب وبعد كده عمل حاجة تانية راح لبني
قريظة بقى اللي هم آخر فئة في اليهود
موجودة في المدينة ودخل على كعب بن أسد

كعب بن أسد اللي هو سيد بني قريظة وده
العقل المدبر بتاعهم، فقال له جئتكَ بِعز الدهر
قال له أنت مين؟ قال له حيي بن أخطب قال له

يخرب بيتك أنت عايز مني إيه؟ أنت وشك ما
يجبش خير أبداً قال له ده أنا جاي لك بعز
الدهر ده أنا جايلك في موضوع عنب ده أنا
جايلك موضوع ملوش حل قال له أبوس أيديك
أمشي من هنا مش عايز أشوف خلقتك خلقتك
سوداء

قال له صدقني ده أنا جاي لك النهاردة بص
موضوع اخر تمام و خلاصة الخلاصة قال له
عايز إيه بس قال له انا جمعت لك قریش
وجمعت لك غطفان وجمعت لك وجمعت لك
وجمعت لك قال له طب عايز مني إيه؟ قال له
أنا عايزك بس كل اللي تعمله لما العرب تهجم
من ناحية الإيه؟ الشمال أنت تخون النبي عليه
الصلاة والسلام وتعملوا عليه زي ما بيقول
كده كماشة تعملوا عليه كماشة أنت من جوة

واليهود والعرب من بره كعب بن أسد رفض
في البداية تماماً فما زال به حيي بن أخطب
لغاية ما أقنعه إن هو يغدر بالنبي عليه الصلاة
والسلام لكن... لكن كعب بن أسد حبر اليهود
دوت قال له عندي شرط قال له إيه الشرط؟
قال له تقعد معايا وتفضل معايا وماتمشيش
علشان لو حصل حاجة تموت معايا ما أنا
مش هروح لوحدي قال له لك هذا والله هقعد
معاك للأخر عشنا عشنا بعض موتنا موتنا مع
بعض وفعلاً ده حصل غزوة الأحزاب وحصل
طبعاً

غزوة الأحزاب الصحابة عملوا خندق فالعرب
ما عرفوش يدخلوا مشركين يعني وبعد كده
بنوا قريظة خانوا النبي عليه الصلاة والسلام
فعلاً وعرف النبي عليه الصلاة والسلام إن هم

خانوه و مبيحموش ضهره ولا حاجة وحصل
إن ربنا في الآخر كما تعلمون نصر المسلمين
بالريح وبالملائكة والريح قامت على جيش
المشركين و الملائكة ألقوا في قلوبهم الرعب
لغاية ما العرب إيه؟ مشيوا

وفضل بقى النبي عليه الصلاة والسلام وبني
قريظة فقامت غزوة بني قريظة والنبي عليه
الصلاة والسلام حاصر بني قريظة وقال لهم
إيه؟ شوفوا أنتم عايزين تعملوا إيه؟ ففي الآخر
يعني اختصاراً للقصة استسلموا للنبي عليه
الصلاة والسلام ما حاربوش خالص وقالوا له
ننزل على حكم سعد بن معاذ ننزل على حكم
مين؟ سعد بن معاذ سعد ابن معاذ كانت
علاقته كويسه بيهود بني قريظة قبل الإسلام
فقالوا يمكن يراعيننا ويدينا حكم مخفف ؛ ف

سعد بن معاذ جه وكان حكمه كالتالي قال أرى
قال ألا لسعد أن لا تأخذه في الله لومة لائم قال
النهاردة أنا مش ههزر مع حد ، النهاردة مش
هجامل حد على حساب دين ربنا

قال أرى أن تقتل مقاتلتهم يعني الرجال تسبى
النساء والذرية

وفعلاً النبي عليه الصلاة والسلام نفذ حكم فعل
معاذ وقال والله يا سعد لقد حكمت فيهم بحكم
الله تعالى من فوق سبع سموات

والنبي عليه الصلاة والسلام خدهم قتل كل
الرجال بمن فيهم مين بقى؟ حيي بن أخطب
هو ده اللي أنا عايز أوصل له إزاي مات حيي
بن أخطب اتقتل حيي بن أخطب في إيه؟
في إيه مع بني قريظة لأن هو فعلاً وفى مع
كعب بن أسد وفضل موجود لغاية ما اتقتل مع

اللي اتقتل من بني قريظة والعجيب إن هو
حتى لما اتقتل كان إيه إنف قوي يعني يعني
يهودي و إيه إنف قوي داخل وهو جاي يتقتل
كان لابس لبس كويس وراح عشان يطيروا
راسه فلقوه قاعدين يعاتبوه قالوا له مش أنت
قولت لنا وهنتصر وهنعمل ووعدتنا ويخرب
بيتك قال لهم والله هذه ملحمة كتبها الله على
اليهود وملحمة لابد أن نذوقها يعني هي ملحمة
و إحنا مكتوب علينا الموضوع ده و إحنا
ملناش فالخير شكلنا كده و إحنا فقر و اخرتنا
سوداء وبتاع فقال لهم هي ملحمة مكتوبة علينا
ونستحملها وخلص ودخل كده عادي وطارت
رقبته وراح في ستين داهية ومات حيي بن
أخطب خلاص بنو قريظة انتهت مبقاش فيها
يهود في المدينة خلاص بعد النبي عليه

الصلاة والسلام بقى بعديها حصل مواقف
كثير وبعد كده حصل صلح الحديبية طبعاً
صلح الحديبية اللي عارفه عارفه اللي مش
عارفه مش مش وقت شرحه لكن هو صلح تم
بين النبي عليه الصلاة والسلام وبين
المشركين اللي هما في قریش إن ميقاش في
قتال ما بينهم عشر سنوات فلما حصل الصلح
دوت و الهدنه دي حصلت أطمئن النبي عليه
الصلاة والسلام إن هو أمن من جانب قتال
المشركين أو قتال العرب فعمل إيه؟ قال لك
فرصة خير هي دي اللي أنا مستنيها ده أنا
عايز خير ديت وفعلاً إن النبي عليه الصلاة
والسلام قرر إن هو يغزو خير لإن خير هي
دي اللي عامله له مشكلة كبيرة دي مركز
التحكم في الفتن في جزيرة العرب الآن واضح

ف مكنش عارف يفضي لهم الآن علشان
قلقان من غدر المشركين وهجوم العرب عليهم
فلما أمن من جانب قریش والعرب تفرغ لخير
راح خد جيشه يلا بينا على خير قصة طويلة
ولكن المهم إن هو دخل خير وفتح خير
وأسر من أسر وقتل من قتل وكان ممن قُتل
زوج صفية زوج صفية اللي هو كان اسمه
كنانة ابن أبي الحقيق، كنانة ابن أبي الحقيق
قتل في يوم خير خدوا بالكم بقا ده الزوج
التاني ل صفية، صفية كانت متجوزة واحد
إسمه سلام بن مشكم كانت متجوزة يهودي قبل
كده إسمه سلام بن مشكم على فكرة يعني هو
أصلاً السبب إن أبوها جوزها أصلاً بدري
علشان بس اللي بيقولوا أنتم اللي بيعيبوا علينا
اللي بيعيبوا إن إن أنتم بتقولوا السيدة عائشة

دخل حصل دخلة لها وهي عندها 9 سنين
صفية أول جوازة لها كان عندها 11 سنه
صفية أول جوازة لها كان عندها 11 سنة
ومات سلام بن مشكم ده مات وبعد كده
اتجوزت كنانة بن أبي الحقيق وكان عندها
16 سنة اتجوزت مرتين قبل وهي عندها
16 سنة يعني مينفعش مينفعش حد يكلمنا في
الحتة ديت لإن مازال اليهود والنصارى
بيجوزوا بناتهم في السن دوت لإن السن ده
المرأة خاصة في بلاد العرب في الحرب
الشديد بتكون بلغت فعلاً بلغت مبلغ النساء
الطويلة وما شاء الله وملو هدمها يعني زي
ما بنقول كده ، تنفع تبقى زوجة عادي صفية
اتجوزت جوزها الأولاني عندها 11 سنه مات
وبعد كده أبوها جوزها كنانة بن أبي حقيق

وكانت لسه متجوزاه يعني فتح خيبر كانت
كانت لسه متجوزاه قريب كانت عروسة جديدة
لكنانة بن أبي الحقيق وحتى قيل إن أبوها
جوزها علشان ما تتجوزش نبي آخر الزمان

هو مش قال أنا هجوزها لواحد يهودي علشان
ما تتجوزش نبي آخر الزمان زي ما كان هو
متوقع لها فاكرين؟ وسبحان الله ما شاء الله و
كان وربنا إذا أراد شيء يكون سبحانه الله،
والعجيب فعلاً إن كنانة بن أبي الحقيق دوت
اللي هو جوزها الثاني اتقتل يوم خيبر وحصل
الأسر بقى للإيه؟ أسر من أسر وكان ممن أسر
صفية

سهلة كده؟ كان ممن أسر مين؟ صفية بنت
حيي بن أخطب اتأسرت في الأسرى، حلو..
والنبي عليه الصلاة والسلام لغاية دلوقتي ما

يعرفهاش خالص ولا يعرف عنها أي حاجة
ولا شافها ولا يعرف عنها حاجة خالص حتى
الآن المهم قال للنبي عليه الصلاة والسلام
صحابي اللي هو اسمه دحية الكلبي أو دحية
بن خليفة الكلبي، دحية الكلبي ده صحابي
مشهور شوية ليه؟ مين يقولي ليه؟ ليه دحية
الكلبي صحابي مشهور رغم إن هو صحابي
يعني هو متواضع يعني مادياً متواضع
وشخص فيعني مش غني يعني فقير، لكن هو
مشهور قوي ليه بقى بسبب غريب كده شوية
صح صح يا أم علي لإن جبريل عليه السلام
كان لما بيجي يتمثل في هيئة بشر ويأتي للنبي
عليه الصلاة والسلام كان غالباً مش دائماً
غالباً كان يأتي على صورة دحية الكلبي، كان
غالباً يأتي على صورة دحية الكلبي علشان

يعرف يمشي بحرية محدش يقوله هو مين ده؟
فكان ياخذ صورة دحية الكلبي ويمشي عادي
بقى ممكن يقابل الصحابة وهما مش واخدين
بالهم، المهم يعني إيه ف دحية الكلبي جه
للنبي عليه الصلاة والسلام ف عادي غزوة
وفيهما فيها سبايا نساء فقال له أنا عايز واحدة
من السبي يعني جارية من السبي فقال له
ماشي خذك واحدة رح شف في السبي وأي
امراة تعجبك خدها ف طبعاً دحية لما نظر
للسبي بلا شك وجد أجمل واحدة في السبي
صفية وجد إيه؟ أجمل واحدة في السبي صفية
بلا مقارنة ف طبعي إيه؟ خدها أنا هاخذ ديت
و أخذ صفية فعلاً في البداية وراح بيها عادي
والنبي عليه الصلاة والسلام ما عندوش مشكلة
في أي حاجة لغاية دلوقتي بعد كده جه واحد

من الصحابة نبيه النبي عليه الصلاة والسلام
طبعاً دحية الكلبي كان له مع احترامنا طبعاً
ليه مش مستوى صافية خالص لا مادياً ولا
ولا كنسب ولا كشيء ففي فرق في المستوى
طبعاً صحابي وعلى دماغنا من فوق تمام؟
لكن في فرق في المستوى فرق في مستوى
كبير في صحابي خد باله من الموضوع دوت
ونيته إيه في الموضوع دوت؟ نيته نية دعوية
وعايز يقول إن راح للنبي عليه والسلام قال
له يا رسول الله أعطيت ل دحية بنت حيي بن
أخطب؟ أعطيت ل دحية بنت حيي بن
أخطب؟ والله لا تصلح إلا لك لا تصلح إلا لك،
متنفعش أصلاً أنت الوحيد اللي اللي تناسبك
أنت خدها هو مش بيقول له اتجوزها وبيقول
لها خدها أنت ف هو...نسيو ان هي دعوية

ازاي تجيب بنت الزعيم تديها لواحد عادي دي
فتنة لها... فتنة لها كبيرة جدا. احنا عايزينها
تُسلم. احنا عايزينها تُؤمن. لعل ده يكون سبب
في إيمان قومها بعد كده. فمفيش حد هيقدرها
وهيعرف يأثر عليها... . وهتبقى فعلا شيء
تقدير لها أنها فعلا تم إكرامها بعد الغزوة دي
إلا أن هي تروح لك انت. أنت زعيم وهي
بنت زعيم. ده منطقي.

فراح نصح النبي عليه الصلاة والسلام. فالنبي
يعني عجبته النصيحة. فراح جاب دحية قال له
معلش هات لي صفية، فجاب صفية، بص لها
النبي عليه الصلاة والسلام عرف فعلا أت
الراجل ده على حق. شايف يا جماعة..

جماعة معلش بنت الزعيم بتبان. بنت زعيم.
باين الوضع، باين المعاملة، باين المشية، باين
الشكل، باين كل حاجة.

فالنبي عليه الصلاة والسلام فعلا قدر وجهة
نظر الصحابي اللي قال له كده استأذن دحيه
قال له معلش بعد اذنك. خذ واحدة ثانية.
ودحيه طبعاً عادي بكل بساطة مفيش مشكلة
يعني راح اخذ واحدة ثانية وخلص وطيب
خاطره وخلص الموضوع دا النبي عليه
الصلاة والسلام بقى راح ايه؟ أخذ صفة فعلا
قال يكرمها. لعل أن هي ايه؟ أن هي تدخل في
الإسلام وقال لبلال خذها وديها للرحل بتاعي..

المهم بعد كده النبي عليه الصلاة والسلام فكر
فكرة لما هو خذها بقى لنفسه هي لسه
مخدهاش زوجة هو خذها كده عادي الأول...

فقال بعد ما أكرمها يشوف بقى المصلحة أب
اللى فعلا كان ناويها هو والصحابي دا
هتحصل ولا لا؟؟

فعرض عليها الإسلام. قال لها ايه رأيك
تسلمي؟ خد بالك اللي بيكلمها ده قاتل أبوها
وجوزها.. . تاني....

اللي بيتكلم اللي هيقول لها تخش الإسلام ده
قاتل أبوها وقاتل جوزها يعني المفروض
مفيش سكة أصلا...

العجيب أن هي أسلمت فوراً فوراً.

النبي عليه الصلاة والسلام طبعاً بالنسبة له
مفاجأة ﷺ بنت زعيم اليهود اللي أنا قاتل
أبوها وقاتل جوزها دخلت الإسلام. وطبعاً ده

احتاج مزيد من التقدير واحتاج مزيد من
الإكرام. المصلحة الدعوية حصلت...

طب ما نكمل في المصلحة الدعوية. فعرض
عليها الزواج. قال لها طب اتزوجك تمام؟؟

وقال لها طبعاً هي أسيرة. خد بالك دي أسيرة
يعني لسه لم تحرر بعد. وطبعاً تخيل بنت ملك
لو اتباعت لو أسيرة فعلاً و اتباعت بتجيب
مبلغ رهيب.

فالنبي عليه الصلاة والسلام قال لها ايه رأيك
أنا اتجوزك ومهرك هو ثمنك.

..يعني ايه؟ هو كان ممكن أي حد يشتريها
وممكن هو يشتريها ويحضرها.

فاتفق معها أن هو يتجوزها وأن مهرها هو
عتقها أن هو يعتقها. وهو ده المهر بتاعها.
فوافقت فوراً.

وده برده من الحاجات اللي هو لسه لغاية
دلوقتي. بالنسبة له موقف ملفت.

يعني أسلمت بسرعة وافقت على الجواز مني
بسرعة ووافقت عادي جداً وهو راجع من
غزوة خيبر بنى بها في الطريق، يعني حصلت
الدخلة في الطريق وهو راجع في الطريق
وقفوا واتعمل.. عمل وليمة وعمل كده حاجة
زي حفل صغي والنبي عليه الصلاة والسلام
دخل في الرحل الخباء بتاعه، ودخل بالسيدة
صفية، لما دخل عليها بقى شافها كويس
بقى، شافها كويس، فوجد في عينها خضرة
وشها فيه كدمات يعني، مخاية تحت عينيها

أخضر.. كأنها واخدة زي ما بنقول كده واخدة
لكمة قوية.

لو حد اداك لكمة قوية، وشك يورم يخضر،
فهو ما كانش واخد باله يعني هو النبي عليه
الصلاة والسلام لما اختار مش ركز في
التفاصيل قوي يعني، امرأة جميلة وبالنسبة لي
مناسبة وبنت زعيم يعني حتى ده يدلك أن هو
بالنسبة له مكنش التركيز قوي في الشكليات
ولو حتى هو نفسه مخدش باله من الخضرة
اللي تحت عينيها إلا بعد ما دخل بها

كان نيته الأصلية لا شك أن النبي حبيب للنساء
عموماً. وهيتجوز ما يعيوش أنه هيتجوز
يتجوز عادى التانية. اشمعنى دي؟؟دي علشان
في نيته، أنها بنت زعيم. ويرجو من إسلامها

إسلام من بعدها. لكن لما دخل عليها بقي ركز
في شكلها لقي تحت عينيها

خضرة وشها في أثر كدمات كإنها مضروبة
لكمية. فقال لها يا صفية ما هذا؟ ايه اللكمة
ديت؟ فقالت له بقي الموقف العجيب اللي فسر
للنبي عليه الصلاة والسلام كل حاجة. ..قالت
أرأيت يا رسول الله؟ قبل قدومك إلى خير
رأيت في المنام. كأن القمر زال من مكانه.
وسقط في حجري ...

القمر النبي عليه الصلاة والسلام قمر يا
جماعة. فهي مش فاهمة حاجة بتقول والله ما
كنت اعلم عنك شيئاً يعني لغاية ما المنام ده أنا
ما اعرفش عنك حاجة كل اللي اعرف أن أنت
أصلاً واحد قاتل ابويا يعني حتى مفيش اي ود
ما بيني وبينك. عشان يطلع حاجة زي كده. أو

تيجى في بالى أصلا. قالت فقصصتها على
زوجي. اللي هو كنانة بن أبي حقيق. قال فلطم
وجهي. مفكرش مترددش ماستفسرش. اداها
قلم وشها اخضر. عليه لعنة الله. قالت
ضربني. تخيل واحدة بتحكي لجوزها ولسه
متجوزها بتقول له أنا شفت القمر ونزل في
حجر. اداها قلم. طبعاً بالنسبة لها اتصدمت
ضربنى بالقلم ليه ؟ دي عروسة جديدة وواحدة
فرحانة بتصحى بتقول لجوزها أنا شفت القمر
ونزل في حجري قالت دي حاجة تفرحه.
خدت قلم وشها أخضر عليه لعنة الله.

وقال لها بصي بقى الكلمة اللي قالها تتمنين
هذا الملك الذي بالمدينة، بتحلمي بالرجل بتاع
المدينة ده.. أنا مش فاهمة حاجة؟ أى اللي أنت
بتقوله دا؟ وإيه علاقته بالمنام؟ لكن الرجل ده

فاهم. ده واحد فهمان في دينه وعارف تأويل
الرؤية وعارف أن القمر هو النبي عليه
الصلاة والسلام. وهو عارف أن هو نبي،
وعارف أن صفة عندهم شبه إحدى زوجات
النبي عليه الصلاة والسلام، في كل حاجة
بتقول له هو ده. إزاي يصدق نفسه عايز
يستوعب؟ مش قادر يتخيل، فراحة لطمها
لطمة شديدة جدا، وكان أمر الله تعالى سبحانه
الله وبعد كده هنا بقى ده اللي يفسر لك بقى هي
ليه أسلمت بسرعة؟ أسلمت علشان اللي حصل
من أبوها زمان. لما قال هو هو الذى نجده في
كتبنا مع أبو ياسر.

◀ والموقف الثاني لما القمر الرؤية جوزها
نفسه هو اللي مفسر الرؤية.

يعني كأن أبوها هو اللي قال لها ده نبي،
وجوزها نفسه قال لها ده نبي

قدرت تتجاوز أن النبي يقتل أبوها ويقتل
أخوها وتزوجت النبي عليه الصلاة والسلام،
طبعاً يعني كان صعب عليها طبعاً مهما كان،
لكن استطاعت تتجاوز هذا الأمر وكان أحب
الناس إليها رسول الله صلّ الله عليه وسلم.
شفتوا الفائدة الجميلة دي؟

النبي عليه الصلاة والسلام يا جماعة كان
بيحب صفة. وكان بيعدل معها .

**خد بالكم هو جوازه منها فيه رساله مهمة
جدا.**

زواج النبي عليه الصلاة والسلام من صفة
كان في رسالة مهمة لقومها لليهود. وهو أننا

رغم العداوة. ورغم أن أنا قاتل زعيمكم أنا
أكرمت بنت زعيمكم. أنا عايزك تتخيل واحد
دخل لأعد أعداءه وانتصر عليه. ممكن يعمل
إيه في ولاده؟؟.. معلىش. أمريكا عملت إيه في
ولاد صدام حسين؟ صح

حصل إيه في ولاد القذافي لما مثلاً حصلت
عداوه دائماً عدوى أنا مش هكرم ولاده أكيد
هاهينهم وهذلهم انتقاماً منه وإذلالاً لقومه. لكن
النبي داعية. فبعت رسالة لليهود أن أنا حكرم
بنت ألد أعدائي. عشان هى أسلمت ولو أسلمتم
هتكرموا ذيهما، فكان بيكرمها قوى دا كان
موقف النبي عليه الصلاة والسلام، معلىش مهما
كان مراته دي هو السبب في قتل أبوها
وجوزها مهما كان ومهما كان النبي واحد
بيقدر لا شك أن الموضوع لها ألم وبردو. قتل

الأب مش سهلة فكان كأنه بيبالغ في ارضاء
صفية. تعويضاً لها عن فقد الأب. وكأنه نوع
من تطيبب خاطر. رغم أن هو مغلطش عليه
الصلاة والسلام. لكن بيقدر المشاعر. خدتوا
بالكم من الفائدة ديه شوفو بقي أنا دلوقتي
هقول لكم كالم موقف النبي عليه الصلاة
والسلام قدر فيه صفية قوي وكان أهتم جدا
جدا بمشاعرها. علشان صفية موجهة.
علشان يطيب خاطرها. علشان النبي بيحس
﴿علشان نبي عنده تقدير للناس بيحس
بالناس.

■ فعارف مين محتاج أراعي مشاعره أكثر من
الثاني ،اه هي مكسورة

■ محتاجة مواساة بردو محتاجه معاملة كويسة
دي فقدت فقدت أغلب قرايبها. ملهاش حد

□ وبالتالي كان يبرأ عيها قوي عليه الصلاة والسلام. يعني مثلا من المواقف اللي حصلت، أن عائشة رضي الله عنها أعتابت صفية. كانت عائشة بتغير منها دي بتنافسها أولا السن قريب. الاثنين سنهم قريب من بعض. وهي جميلة جدا. وحفيدة نبي. يعني برضو الكلام كبير. فالسيدة عائشة كانت بتغير منها طبعاً.

فمرة كده يعني خدتها الغيرة وقالت يا رسول الله حسبك من صفية أنها هكذا. يعني قصيرة. وهي كانت قصيرة. حسبك من صفية أنها هكذا.. كانت قصيرة القامة شوية. فالنبي عليه الصلاة والسلام غضب من عائشة. ولما يشوفها عائشة بالنسبة له ايه؟ عائشة بالنسبة له نمرة واحد مهما كان ..

العدل هو العدل مش عشان أنت حبيبي
هعدليك ومش عشان أنت أحب الناس إليّ
هفوتلك ولا أحب زوجة لي هعدليك لا متجيش
على صافية. ما تأدّيش صافية. فقال عليه
الصلاة والسلام مؤدبا ومعلما.

☞ قال عائشة والله لقد قلت كلمة لو مزجت
ماء البحر لمزجته. يعني هي مقاتش كلمة هي
شاورت بس. بس المشاورة زي الكلمة خلاص
ما هي اتفهمت. فدي غيبة حتى المشاورة غيبة
يا جماعة.

❗ الغيبة ممكن تكون بالإشارة. ؟ الغيبة
ممكن بالكلام. تمام ؟

فالسيدة عائشة بيقول لها أنت قلت كلمة لو
الكلمة دي إتحول الذنب اللي خدّتيه لو إتحول

للون ، اللون ده لو حطيناه في بحر البحر كله
يتصبغ. طبعاً السيدة عائشة أترعبت إيه ده؟؟
افتكرت بقى أن هقول كلمة وهتعدى، أنا غالية
،أو يعني مش هيدافع عن صفية بسرعة. عليه
الصلاة والسلام. .

لأ في مراعاة عالية جداً. حتى في غيبتها. في
غيبتها. دافع عنها عليه الصلاة والسلام.

☞ مرة ثانية بقى المرة دي الضربة جت من
زينب كانت بتغير من صفية بردو ويعني ده
شيء زي ما قلنا معفو عنه منقدرش نعاتبهم.
لكن برضو في أخطاء يعني الغيرة بتحمل
المرأة على بعض الأخطاء هم مش معصومين
أنا هقول لكم موقف حفصه الأول. عشان
مواقف زينب أصعب شوية حفصة رضي الله
عنها وأرضاها ، بلغ صفية سمعت أن حفصة

قالت عليها أنها بنت يهودي وهي بنت يهودي
فعلا لكن في فرق أن أنت بتقول كتعريف. أنا
بقول صفية بنت اليهودي حيي بن أخطب.
كتعريف وبين قصدك الانتقاص. فهي سمعت
أن حفصة قالت عليها بنت يهودية تريد
انتقاصها فبكت دخل عليها رسول الله صل الله
عليه وسلم وهي تبكي.. فقال ما يبكيك يا
صفية؟ خد بالك الإحساس، خد بالك تقدير
المشاعر، خد بالك حساسية النبي عليه الصلاة
والسلام تجاه مشاعر صفية بالذات.

قالت أن حفصة بنت عمر خد بالك بنت عمر
يعني عايزة تقول له أنا عارفة أن لها قدر
عندك.

✍ بس شوف بقى النبي هيعمل معها إيه
قالت أن حفصة بنت عمر قالت عني إني ابنة

يهودي، شوفوا النبي عليه الصلاة والسلام
يحيل الموضوع إزاي ذكاء، سرعة بديهة،
فطنة، جبر خواطر، ذكاء إجتماعي، كل اللي
عايز تقوله قوله في الكلمة اللي هتيجي دلوقتي
ديه فقال النبي عليه الصلاة والسلام لا، بل
أنت ابنة نبي وعمك نبي وزوجك نبي ففيم
تفخر عليك حفصة، الله إيه دى إيه الجمال دى
إزاي قدر يحول الموقف بسرعة كدا لصالحه،
إزاي قدر يطيب خاطرها كدا قالها لا أنت مش
بنت يهودي أنت بنت هارون عمك سيدنا
موسى وزوجك أنا فعلما تفخر عليك حفصة
أبوك نبي يعني هارون وعمك نبي موسى
عليه السلام وزوجك نبي عايز إيه ثاني هو
فيه أحسن من كدا أنت ممتازة، أنت رائعة،
وراح لحفصة مش هيسيب راح لحفصة وقال

اتقي الله يا حفصة في صفة خلاص كلام
وقتي سبحان الله قوي مفيش هزار في عدل في
مراعاة للمشاعر مقبلش الغيبة أبدا مقبلش
الغيبة أو عى تقبل الغيبة أو عى تقبلي الغيبة
أو عى تقبلي حد يغتاب قدامك قال ففيم تفخر
عليك سبحان الله مرة ثانية السيدة زينب النبي
صلي الله عليه وسلم كان في غزوة كان راجع
من الحج خد بالك النبي عليه الصلاة والسلام
كان بيحب جبر الخواطر قوي كان يرغب
الناس قوي فيطلع من الناس الحلو اللي جوهم
دى ممكن فيه لايف لوحده بس مش دلوقتي
كان يطلع الحلو اللي فيك يعني أنت فيك العيب
الحاجة دي تتفع تبقي من ناحية عيب ومن
ناحية ميزة، فيركز على الميزة مش على
العيب نتعلم كدا مع ولادنا متقولش ابني شقي،

قول ابني نشيط، متقوليش بنت لكاكاة، قولي
بنت متكلمة جيدة ابني مثلا لعبي لا قول قوي،
يا جماعة طلّعوا الحلو اللي في ولادكم، أحنا
اللي بنهدهم أحنا اللي بنخيبهم، في زاوية
ممکن تشوفها زاوية ثانية طب مش شايفه،
اللعبي دي شايفه نشيط، ليه شايف الرغبة دي
مش شايفها متكلمة جيدة، ليه شايف الولد دي
حشري مش ذكي طلع الحلو أجبر بالخاطر..
كلمة تفرق يا جماعة، مرة واحد شاف الإمام
الذهبي فشاف واحد بيكتب كان ممكن يقوله ايه
اللي بتكتبه دي أنت بضيع وقتك قبل ما يبقى
الإمام الذهبي دي كان لسه في.. بص كدا لقاه
بيكتب أي حاجة فقال له كلمة عملت الإمام
الذهبي قال إني خطك يشبه خط المحدثين
فوقعت في نفس الإمام الذهبي وطلب علم

الحديث لغاية ما بقى الإمام الذهبي، عبد الله بن مسعود عدى على واحد اسمه زازان كان مغني في أيامه فسمع الصوت وهو بيغني فقال ما أجمل هذا الصوت لو كان بالقرآن، فالرجل ده تاب وصار من أتباع عبد الله بن مسعود، الكلمة الحلوة بتفرق قول كلمة حلوة، أجبر بخاطر اللي أمامك، طلع الحلو اللي جو الناس.

المهم زينب بقى عملت موقف غريب رضي الله عنها وأرضاها كان النبي راجع من الحج مرة وكان معه الزوجات، فالبعير بتاع السيدة صفية تعب فالنبي كان عارف أن السيدة زينب معاها أكثر من بعير فقال للسيدة زينب أدي صفية بعير من بعيرك جمل من جمالك فقالت أنا أعطي تلك اليهودية، طبعاً دي هاشمية. قالت أنا أعطي يهوديتك تلك اليهودية، فغضب

النبي غضبا شديدا على زينب، فهجرها وهو راجع من مكة للمدينة كان في أيام الحج مكلمهاش طول أيام مكة ولا أيام منى ولما رجع المدينة مكلمهاش أحنا في ذي الحجة، مكلمهاش في ذي الحجة ومكلمهاش في محرم ومكلمهاش في صفر ومصالحهش غير في ربيع الأول، ثاني مكلمهاش في بقيت ذي الحجة ولا محرم ولا صفر خالص ولا رحلها بيتها ولا أدها أيامها عشان دى عقاب ليه وصالحاها في ربيع الأول، في ربيع الأول دخل عليها فمن كتر ما هي فرحانة بالنبي عليه الصلاة والسلام قالت له أنا أسفة وأدته جارية هدية قالت له أنا مش عارفة أعمل إيه وأنا مش عارفة أنا قولت إزاي كلمة ذي ديه.. ثلاث شهور هجر زينب وهو بيحبها جدا عشان قالت كلمة في

صفية ما فيش كلام، جبر خواطر محترم،
مراعاة، إحساس. النبي- عليه الصلاة والسلام-
صاحب إحساس مرهف، صاحب تقوى و
ورع.

☞ مرة بقى ايه بصوا بقى السيدة صفية
ذكاء السيدة صفية بقى إزاي كانت بتعرف
تكسب الناس؟ صفية- رضي الله عنها -مرة
هي بقى هي راجعة بقى من الحج عملت
موقف موقف يعني شوفوا برضو ايه يا
جماعة فيه أدبيات كده بنتعلمها من السيدة
صفية إزاي مرأة ذكية تعرف تحل مشاكلها
وهي راجعة من الحج مع النبي -عليه الصلاة
والسلام- البعير بتاعها اللي هو تعب دوت.
حلو؟ لما البعير بتاعها تعب وبرك قعدت تبكي
قعدت إيه تبكي فالنبي- عليه الصلاة والسلام-

يعني طيب خاطرها ومسح دموعها. فاستمرت في البكاء، تمام؟ وأكثر في البكاء فزجرها النبي -عليه الصلاة والسلام- وانتهرها زعق لها بقى ما كفاية خلاص كفاية يعني عايز يقول لها خلاص كفاية عياط بقى قعدت تعيط وبتاع خلاص خلاص أهدي هجيب لك غيره خلاص أهدي. وزودت في العياط فزعق فيها زعق فيها. فلما زعق فيها خافت كشت فقالت أحل الموضوع ده إزاي؟ وإزاي أصالحه -عليه الصلاة والسلام- **هتعمل حنة حركة ما لهاش حل. قالت أنا إزاي أصالحه؟ إزاي أعمل حركة سريعة قبل ما يخاصمني ، قبل ما يهجرني قبل ما يعمل حركة، قبل ما يزعل مني؟.. راحت بسرعة عملت حركة من أذكى ما يمكن. جماعة صفية أنتم الحقيقة برضه**

واحدة ذكية يعني ذكاء عالي جدا عقلها عقلها
فوق راحت للسيدة عائشة، خد بالك من
الدماغ. راحت للسيدة عائشة. فقالت يا عائشة
والله لم أكن لأضحى بيومي قط. يعني أنا كل
واحدة لها يوم مع النبي -عليه الصلاة والسلام-
. قالت لها عمري ما أضحى بيومي. بس أنا
النهاردة ده يومي النهاردة. وأنا وهبت لك
يومي للنبي عليه الصلاة والسلام عشان هو
بيحبك وقولي له أن أنا اتنازلت عن يومي وأنا
بصالحه بيكي عشان يرضى عني وما
يزعلني مني. فطبعاً السيدة عائشة إيه؟ على
مزاجها حلو جدا و وافقت على طول.
واتزينت واتطيبت واتعطرت وراحت دخلت
على خباء النبي عليه الصلاة والسلام في
الخيمة بتاعته. فاتفاجئ بيها قال لها يا عائشة

ده مش يومك. يا عائشة ده يوم صفية. فحكيت
له القصة وقالت يا رسول الله ذلك فضل الله
يؤتيه من يشاء ذلك فضل الله يؤتيه من يشاء...
المرأة الذكية يا جماعة بتعرف تحل مع
جوزها بكلمة سريعة بموقف سريع
والموضوع سخن بنخلص بسرعة. لو بات
الموضوع لو طول ممكن ما يتحش. سريعة،
ذكية ، عاقلة ، حكيمة سبحانه الله.

النبي- عليه الصلاة والسلام- كانت هي بقى
إيه لها برضو حركات حلوة السيدة صفية. كان
مثلا النبي -عليه الصلاة والسلام- يبقى في
المعتكف بتاعه كان بيعتكف فكانت تروح له
الاعتكاف بتاعه وتقف معاه وتكلمه تسأل عليه
وتتعد تتكلم معاه وكأنها إيه بتسليه في اعتكافه.
مش مش بتخش معه ولا هو بيطلع لها. لكن

كانت تروح له لغاية الاعتكاف و تقعد تكلمه-
رضي الله عنها وأرضاها-. حتى أن هو مرة
كده قعدت كلمته بعد العشاء بعد التراويح
قعدت تكلمه شوية وبعد كده حب النبي- عليه
الصلاة والسلام- برضه يقدرها.. فراح مشى
معها كده طول المسجد لغاية ما وصلها عند
باب المسجد عند باب المسجد. ففي صحابة
كانوا معدين فبصوا كده شافوا النبي واقف مع
واحدة وطبعا صفية منتقبة. و ده هنشوف
دلوقتي الدليل. فعدوا عادي فالنبي نادى على
الاثنين صحابة قال على رسلكما أنها صفية.
نعم هو أحنا هنشك فيك؟ هو أحنا هنشك فيك؟
قال ثواني دي صفية مراتي. الصحابة يا
رسول الله وأحنا هنشك فيك؟ قال لهم بس ده
احتياطي. "إن الشيطان يجري من ابن آدم

مجرى الدم من العروق" "إن الشيطان يجري
من ابن آدم مجرى الدم من العروق" فخشيت
أن يقذف في قلبكما شيئاً ده فيه عدة فوائد
الفائدة الأولى أن دليل على أن السيدة صفية
كانت منتقبة. بدليل أن هم ما عرفوهاش ما
شافوهاش. فيا ريت البنات اللي بيسمعوني إيه
رأيكم ناخذوا قرار بغض النظر بقى عن حكمه
واجب مستحب يلا بينا إيه رأيكم قرار حاولي
تنفيذه، خطة في أي وقت بقى. لازم في يوم
من الأيام تلبسي لبس زوجات النبي- عليه
الصلاة والسلام-. إيه لبس زوجات النبي كلهن
كن منتقيات. بغض النظر بقى عن إيه واجب
ولا مستحب؟ هو ده زوجات النبي عليه
الصلاة والسلام. لازم يكون في خطأك من
الآن لغاية ما ربنا ييسرها لك أن تلبسي كما

كان تلبس زوجات النبي- عليه الصلاة والسلام- واللي لبساه ربنا يوفقك ويبارك لك ويرضيكى ويا رب يجمعكم كلكم اللي لابسة واللي مش لابسة يجمعكم كلكم مع زوجات النبي- عليه الصلاة والسلام- الحاجة الثانية أن لازم نتعلم النبي عليه الصلاة و السلام

ما نقفش موقف ريبة واحدة تقول لك أنا بقف مع شباب وبنات في الكلية بس وقفة محترمة موقف ريبة أصل هو وقف معايا واتكلمنا وكان الدفعة كلها معدية علينا بس هو ما كنش بيقول لي حاجة موقف ريبة ما توقفيش نفسك موقف ريبة علشان النفوس وحشة علشان الشيطان بيقدف في القلوب هيقولوا البنت دي شمال، هيقولوا البت دي بتحب ، هيقولوا البت دي مش مضبوطة وأنت يا عيني مش واخدة

بالك من حاجة والناس بتتكلم عليك وأنت اللي عملت في نفسك كده ما تقفيش مع واحد موقف ريبة، أنت ما تقفش مع واحدة موقف ريبة. الكلام بيكثر وقولوا لي اللي أنا بقوله ده صح ولا غلط واتلستوا منه ولا ما اتلستوش منه؟ وشفتوا اللي اتلسع من المواضيع دي ولا ما اتلستوش؟ بس ردوا عليا بعد كده مشيت بقى الأحداث السيدة صفية كانت بتعبد الله عبادة عظيمة جدا. وكانت بتطلب العلم حتى أن هي لها مرويات في السنة يعني شوف اتجوزت امتى؟ كان لها مرويات في السنة. وظلت مع النبي -عليه الصلاة والسلام- إلى أن حضرت وفاة النبي -عليه الصلاة والسلام-. فلما حضرته الوفاة قالت صفية والله يا نبي الله لوددت أن الذي بك بي لوددت أن الذي بك

بي والله نفسي اللي عندك ده يبقى عندي شف
حبها ليه ده ده ده خلاص يا جماعة واحدة
تانية بتحبه جدا. فطبعاً مين اللي غار؟
الزوجات فغمزوها كده عايز أن أنت بس
بتعملي موقف علينا يعني ، يعني لازم تقولي
كلمة يعني عشان تبيني أن أنت أحسن مننا
يعني؟ فالنبي خد باله خد باله أن هم بايه؟
قاعدين يغمزوا البعض. بصوا بتستغل الموقف
فقال لماذا تتغامزون؟ تغمزوا البعض ليه؟ والله
إنها لصديقة. يا سلام! شهادة عظيمة جدا.
شهادة عظيمة جدا. قال والله إنها لصديقة.
يعني صديقة في مشاعرها ناحيتي. صديقة في
نيتها فعلاً فعلاً تتمنى لو اللي فيا فيها فين
الزوج يا جماعة اللي في زوجة تقول يا رب
ياخد مني ويديك يا رب يديك على قد نيتك

يخرب هههه فين الزوجة اللي نفسها تشيل هم زوجها؟ نفسها اللي في زوجها يبقى فيها. يلا.
فضلت السيدة عائشة بعد موت النبي - عليه الصلاة والسلام- شهدت خلافة ابو بكر وعمر وعثمان وعلي. وماتت في زمن معاوية ماتت في زمن معاوية مرة كده حصل موقف في زمن عمر في واحدة راحت لسيدنا عمر قالت له صفية ما زالت تحب يوم السبت

السبت عشان اليهود بيعظموه، و صفية تصل اليهود يعني بتوصل اليهود بشوفها بتزور يهود. فعمر أرسل لها قال يا أم المؤمنين بلغني أنك تعظمين يوم السبت، و تصلين اليهود. فقالت يا أمير المؤمنين أما السبت فوالله ما أحببته قط منذ أسلمت ،ومنذ أبدلني الله به يوم الجمعة وأما زيارتي لبعض اليهود فإنك تعلم يا

أمير المؤمنين أن لي معهم رحماً وقرابة وأنا
أصلهم ما فيهاش كلام. ليها لسه قرايب يهود.
وشوف برها بقرايبها اليهود. أمال دي يا
جماعة بتعمل إيه مع المسلمين؟ إذا كان
بتوصل قرايبها اليهود لغاية دلوقتي. مراعاة
للرحم. فما بالك أخلاقها مع جيرانها المسلمين
ووصلها لحبايبها المسلمين... المرأة المسلمة
المفروض تبقى كده في خلافة عثمان كان لها
موقف روعة مع سيدنا عثمان سيدنا عثمان لما
أحاط الثوار بيه أنتم عارفين سيدنا عثمان
حصل فتنة في زمنه وكان في ثوار جم من
العراق وأحاطوا ببيت عثمان وأرادوا قتله.
خرجت السيدة صفية بالجمال بتاعها وراحت
عند بيت عثمان عثمان تعلن دعمها لسيدنا
عثمان. ورغبتها في حماية سيدنا عثمان.

صفية زوجة النبي- عليه الصلاة والسلام-
طلعت بالجمال بتاعها. و وصلت إلى بيت
سيدنا عثمان عثمان تخش وتعلن دعمها له.
فما كان من بعض الأيّه الثوار دول وكان
يدعى الأشطر و اسمه مالك ابن الحارس هو
ده زعيم الفتنة راح ضرب الدابة بتاعة السيدة
صفية ضربها لغاية الدابة حولت وجهها.
السيدة صفية خافت أن هم يقتلوها فعلا فعادت
إلى بيتها ولكن كان الثوار منعوا الطعام
والشراب عن بيت عثمان منعوا ايه؟ الطعام
والشراب عن بيت عثمان فالسيدة صفية بنت
مسار من خشب. أمرت ببناء مسار من خشب.
بين بيتها وبين بيت عثمان وكانت تأمر
غلمانها أن ينقلوا الطعام والشراب على هذا
المسار الخشبي إلى بيت عثمان طبعاً ما حدش

يقدر يعمل حاجة مع أم المؤمنين. فده كان بيعدي كان لازم يعدي فنصرت عثمان بنفسها وبدابتها وبغلمانها وبهذا المسار الخشبي. شجاعة وقوة حاجة رهيبة جدا. وظلت السيدة صفية تعيش عابدة طائعة تتعلم وتنصح وتؤدي حق الله تعالى الى أن ماتت في زمن معاوية رضي الله عنه وأرضاه. أين الآن صفية؟ مدفونة في البقيع اللي يروح البقيع يا جماعة لمقابر البقيع فيها مين؟ فيها صفية بنت حيي بن أخطب رضي الله عن صفية اللهم أرضى عن السيدة صفية رضا عظيمًا وأجمعنا بها يا رب في أعلى عليين. درس عظيم يا بنات. وسيرة رهيبة وفوائد ما لهاش حل ومش عارف الدرس بيطول كده إزاي؟ يعني مع أن الواحد يبقى بيقول هتكلم يعني نص ساعة.

لكن الموضوع كبير كبير. الزوجات
الموضوع كبير والله أنا باختصر اجري عشان
الموضوع يتلم معايا. يا رب نكون استفدنا
وانتفعنا بهذه السيرة العظيمة ويا رب يجمعنا
مع هؤلاء الأكابر في أعلى عليين. ويا رب
يرزقن عفاف وحياء وحجاب امهات
المؤمنين. وجمعكم بهن في أعلى عليين. اللهم
امين. اشكركم على حسن السماع والمتابعة.
سبحانك اللهم ربنا وبحمدك اشهد ان لا اله الا
انت أستغفرك و أتوب إليك. جزاكم الله خيرا.
درس صعب ،صعب فعلا أنا قولت هتكلم
النهاردة ساعة الا ربع بس. كالعادة الموضوع
ما بيخلصش أبدا أبدا. سيرة عظيمة فعلا.
سيرة رهيبة. إيه ده؟ إيه يا جماعة ده؟ إيه
اللي احنا بنسمعه ده؟ احنا مش موجودين مش

موجودين على الخريطة الله المستعان ربنا
يعفو عنا يارب و يسامحنا السيدة صفية نعم
الزوجة و نعم الأخلاق و نعم الرعاية و العناية
و النبي-صلى الله عليه و سلم- مواقف مع
الزوجات دروس رهيبة جدا يعني يارب
تكونوا استفدتوا يعني إن شاء الله يارب أقدر
أكمل في السلسلة دي و تبقى سلسلة كويسة إن
شاء الله تستفيدوا بيها و يمكن نقلها دورة في
يوم من الأيام محدش عارف أعتذر ليكم على
الإطالة و أشكركم على حسن السماع، جزاكم
الله كل خير.

**سبحانك اللهم ربنا و بحمدك أشهد أن لا إله
إلا أنت أستغفرك و أتوب إليك حاولوا انشروا
بقى الكلام دا السلام عليكم اللايف هتلاقوه
على الصفحة متسجل**